

NO LONGER PROPERTY OF  
CHINESE JAPANESE LIBRARY  
HARVARD YENCHING INSTITUTE  
AT HARVARD UNIVERSITY  
HARVARD-YENCHING LIBRARY

JUN 20 1953

*gift*







晦軒先生實紀卷之四

附錄

賜祭

附諸賢祭文

英宗朝賜祭墓文

庚申知製  
製進佐郎邊

教李潤身  
是中賣來

吾道之東伊誰之力斯學之闡伊誰之德小白之高  
竹溪之濤惟靈稟降澤至于今粵麗之李人道賀賀  
嗟哉學宮鞠爲草茂靡靡佛教人心墊沒宣尼之道  
幾乎泯絕獨自隱憂異端斯闢先聖遺像奉來中國  
籩豆鐘磬秩秩俱備六經子集講明道義於焉太學  
始有矩矱心傳晦翁學則濂洛斯文之作吾儒之祖



百世宗師海東夫子白雲一畝院宇載肅紹修之額  
聖祖攸錫松林之塚自官而守歲一祭之其永不朽  
輦路之過追想倍切奠此泂酌庸表偉烈

正宗朝賜祭廟文

乙丑 上幸華城謁聖廟  
親製祭文特告安文成公

展也文成素王忠臣珠衡玉斗照我東人燕肆購書  
非經則史惜不還爾蔽此明譚

太上朝賜祭墓文

壬申禮官李  
東鉉賣來

天挺大賢闡教吾東學問道德百世儒宗麗俗委靡  
竺教是崇不有先覺孰開爾昏息邪拒諛師尊道存  
宣尼宮牆上仁宅里畫摹賢聖書購經史化被蚩氓



牖我蒙士凡有血倫懿德之好三韓舊染一變至道  
兆啓斯文 聖祖膺運仁理宣朗垂世於萬有赫道  
統聖庶膺祀 列聖崇獎追報備至予邁舊都展誠  
先師睠茲學宮伊誰扃施念茲儒教實資訓迪尚德  
明禮厥有成式允矣君子俾也可念大德之原衣履  
攸藏予懷之遠有洞其酌侔官致侑靈庶歆格不同  
今上朝賜祭墓文已酉通政大夫長湍  
郡守李奭宰賁來  
展我青邱粵自殷師誕敷八條一變鄙夷世級漸降  
至于麗季竺教滔天正路則圯上帝曰咨盛衰皆理  
乃開奎運乃降文成兩肩擔笈惟是倡明致力首善



終始張擴置田贍學又納臧獲七十二弟爰暨考亭  
奉來遺像儼厥典型有爛紉帙相隨渡東爲文告戒  
諭我羣蒙疇昔文廟春草滿庭今焉昏衢高揭日星  
啓我文治垂五百年里洛村閩家誦戶絃誦本原始  
伊誰之功列聖崇報庶位斯穹夙朕山仰恨不同  
時茲當西巡曠感尤滋蹕路指點堂封峨峨九原難  
作奈吾道何尚冀精靈陰隲斯文樹我綱紀賁我景  
員侔官致醑歆此苾芬

祭紹修廟文

沈通源

惟我海東厥初鴻荒箕子受封八條斯張綿綿千載



道統將亾公實發揮於赫有光學述洙泗心傳紫陽  
啓我後人咸知向方窈窕雲洞寔公桑鄉廟貌儼然  
數仞宮牆眇余雲仍濫佩金章仰瞻遺像宛若陞堂  
恭奠菲薄庶佑一嘗

李滉

尊信斯道闡教吾東功存學校百世攸宗

後孫珖

心傳晦翁學宗東魯領袖斯文日月東土衛道一時  
垂教千世起欽新廟匪私殷禮

李埈  
石



吾東自箕子之沒道學之失其傳幾千有餘年幸而  
我文成公出焉慨然以興學校衛斯道爲己任倡率  
學者知尊經術知慕聖賢知天理人欲之不可混使  
吾東文獻之盛軼于中州其功偉然豈惟一時相業  
之彪炳而已也文貞之公正處心文敬之剛直有稱  
雖其資稟之有過人者而亦莫非發於家庭觀感之  
善事業雖不同而要皆有功吾道空其血食粉榆有  
永靡替其盛德遺範直與小白同高竹水俱長也貌  
我小子實於公爲外裔嘗聞白雲一畝宮是公妥靈  
之地而亦有遺像掛在廟壁路歧失腳未嘗一謁祠



庭以寓羹牆之慕今者叨恩出守仰止前列酌以一  
卮懷然興敬

後孫應昌

順原君

伏以太師東封疇教是張歸來千載道統將亾我祖  
發揮遠紹絕學功深啓開東土日月寔公桑鄉有廟  
肅肅不以木主于以像設余來展謁宛陞堂室羹牆  
猶覩矧茲儼若念惟似續莫非遺軀遐思近慕仰瞻  
俯涕幸忝祿位叨守侑邑肆陳牲醴冀鑑忱幅

祭墓文

閔聖微堂

八條教衰大道榛塞天挺先生首倡絕學身任繼開



閑聖闢異荆修庠序儒風蔚起家習禮義人誦六經  
於焉海東始宗考亭昏衢揭日一變陋俗餘波所漸  
實多私淑遂及我朝繼有大賢濟究其本皆公淵  
源睠茲大德衣履攸藏一片貞珉表厥若堂譜忝外  
裔職守藩翰夙慕遺烈敬奠一醺

碑誌

墓誌

公姓安氏初諱裕後改珦前後諱史俱失表德入我  
朝避顯陵御諱以初名稱自號晦軒系出順興曾  
祖曰子美保勝別將贈神虎衛上護軍祖曰永儒贈



樞密院副使考曰孚密直副使版圖判書致仕贈守  
太師門下侍中妣剛州禹氏禮賓丞同正成允之女  
元宗初公年十八登第補校書郎遷直翰林院三別  
抄之亂公陷賊賊素重公名令其徒曰縱安翰林者  
罰公以計得脫王義而嘉尚焉奉使西道以廉謹被  
獎召還內侍院奏祛院中宿弊尋遷監察御史忠烈  
元年出爲尚州判官時有女巫三人奉妖神惑衆所  
歷傍縣人皆奔波崇奉列邑守宰亦靡然從之巫至  
尚公杖而械之巫託神怵禍福州人皆懼公不爲動  
其妖遂不得肆在尚三年按廉使褒其政遂徵爲版



圖佐郎俄遷殿中侍御史陞國子司業由右司議拜  
左副承旨又以副知密直司事入參功臣號賀宴公  
作詩以進詩逸不傳王嘉賜白粒五十石後出鎮合浦撫

恤軍民州郡以寧屢遷判工曹事僉議參理忠宣卽  
位拜參知機務行東京畱後集賢殿太學士雞林府  
尹復爲參理及忠烈復位忠宣如元公從行一日元  
主召王急王懼丞相出曰從臣爲首者宜入對公入  
丞相傳旨曰汝王何不近公主公曰閨闈之事固非  
外臣所能知亦非今日所宜問丞相還奏主曰此人  
可謂知大體者庸可以遠人視耶遂不復問後拜贊



成事尋加都僉議中贊公憂學校日廢議于兩府曰  
宰相之職莫先於教育人材今養賢庫殫竭無以養  
士請令朝官各出銀幣有差歸諸庫以贍學錢兩府  
從之聞于朝王亦出帑藏而助之密直高世自以武  
人不肯出錢公乃歎曰夫子之道垂憲萬世臣忠於  
君子孝於父是誰教耶若曰我武人何苦出錢以養  
爾生徒則是無孔子也其可乎世聞之慚甚出錢公  
又以餘貲付博士金文鼎等送中國畫先聖及七十  
二子像并購祭器樂器六經諸子史來且薦密直副  
使李懌典法判書李瑱爲經史教授都監使於是禁



內學館內侍三都監五庫願學之士及七管十二徒諸生橫經受業者動以數百計有諸生不禮先進者公怒將罰生謝罪公戒曰吾視諸生猶吾子孫諸生何不體老夫意仍引至家置酒諸生相謂曰公之待士以誠如此若不化服我則非人相戒莫敢違自是儒風大振其在三司左使修文殿太學士時王命公監修國史以都僉議中贊致仕卒卽忠烈三十二年丙午九月十二日甲申也享年六十四贈謚文成道德博聞曰文安民立政曰成及葬七管十二徒諸生素服祭於路忠肅王五年戊午命圖形文廟又六年



已未從祀文廟東廡公爲人莊重安詳人皆畏敬在  
相府能謀善斷同列皆愛慕不敢出一言以爭王氏  
之世父師化述學校頽廢舉世賀賀徒知竺教之爲  
尚不復知有吾道公獨孤倡濁時常以興學育才爲  
已任慨然有詩曰香燈處處皆祈佛簫管家家盡祀  
神獨有數間夫子廟滿庭春草寂無人力學求道援  
蹟蘊奧直繼殷師已絕之統蔚爲東方理學之祖每  
訓誨後學必先以孝悌忠信引之於高明正大之域  
揭燭長夜丕變陋俗當時人材之盛學校之興繫公  
是賴雖謝事家居其於興學養賢未嘗忘于懷喜賓



客好施與文章清勁且有識鑑金怡白元恆未達時  
公見之曰他日必皆貴顯李齊賢李與同年生俱有  
名公令賦詩見之曰齊賢必貴且壽異則不年果皆  
驗晚年嘗掛晦菴先生真以致景慕遂號晦軒嘗蓄  
儒琴一張每遇士之可教者勸之又以土田臧獲義  
補學舍供給其徒甚蕃歲於公諱日輒備物報祀今  
尚不已入我朝恭定大王追念公之有功斯文特  
教公子孫東西班錄用雖庶出亦勿屬軍役以崇乃  
祖之德仍命學宮婢女勿選入宮中蓋毋忘公崇  
學之意不欲遷推他役也成廟朝壬子命修公



墓禁樵牧

中廟朝周慎齋世鵬知豐基郡卽公平

日講學之地創建書院春秋享祀實東國書院之始也嘉靖己酉退溪李先生繼知郡事增定學式上書方伯以聞于朝明廟親筆賜額紹修仍命太學士申光漢撰記文又賜土田臧獲經籍以示敦崇列聖褒寵吁亦盛矣慎齋嘗謂文成所向之正一洗三韓之陋邇來二百四十餘年天理明而文教興若李益齋鄭圃隱諸先生皆公之餘波所漸如公者真可謂東方道學之祖斯道之不亾其誰之力耶者信不誣矣公墓在於長湍府北松林廢縣東大德



山北坐子向午之原祭田多在墓下自官給復歲致  
享祀至今不絕公前夫人漢南金氏右司諫祿延之  
女生一男五女子曰于器贊成事順平君竹屋先生  
女適知開城府事文頊次適判典客寺事許綬次適  
通文署錄事朴濟次適直史館韓守延次適贊成事  
貞景公金士元後夫人瑞原廉氏禮賓卿守藏之女  
無嗣順平娶門下侍郎鐵原崔冲若女生一子牧密  
直提學順興君文淑公號謙齋文淑娶政丞光州金  
台鉉女生子元崇政堂文學順城君文惠公文惠娶  
評理原州元善之女生瑗刑曹判書景質公景質以



後屢百年子姓諸孫冠冕奕世布列卿相至今綿綿  
殆不可勝記而益隆外裔代出國母誕生聖人金  
枝玉葉不啻若螽斯之誦誦則茲豈非公積善之慶  
能深其根固其本而然耶公之神道舊有表刻經今  
三百五十餘年殘缺難識深恐使我先祖衣履之藏  
泯沒而無傳吾父子不揆力綿已卯與宗人鳩財買  
石豎豐碑而竊惟墓不可無誌更圖燔誌納壙俾傳  
悠久且防患災云 皇明崇禎九年丙子冬十四代  
孫應昌再拜謹誌

墓碣銘

并序



晦軒先生元初麗季時人也其墓在長湍之大德山  
負子原實忠烈王所賜之地而及我朝列聖或封  
或祀至今六百餘年凡有血氣者莫不山仰而興慕  
焉則雖無麗牲之文亦可也惟先生後孫諸公自經  
滄桑非惟益懼其陵谷之變且欲以先生狀德更謀  
顯刻而喚醒一世人之心目以壽斯文後寧德殷宋  
炳華敢爲之序而銘其序曰嗚呼自天尾旅奎文運  
不明儒者亦不過言語文字之是尚而昧華夷之大  
限醉佛氏之糟粕使堯舜舊疆陷爲夷狄檀箕遺黎  
淪爲禽獸而其禍極矣然純陰之中亦不爲無陽剝



盡於上則復生於下此理之常也時則中州有仁山  
金氏海東有先生獨以孔朱正道整頓天地而終啓  
我大明朝鮮一治之盛以復堯舜檀箕之舊雖其  
相去萬里初不相識而出處隱顯又隨地而或異其  
道也同故其功亦相埒俱不在禹下矣然仁山則居  
關閩不遠之地又私淑於北山魯齋之門而有聞焉  
若先生則生於海外偏方不由師傳而獨倡正學如  
一髮之引千斤而能洗千百餘年三韓之陋其事視  
仁山尤加難矣此其所以爲東方理學之祖也歟於  
戲盛哉先生諱裕後改珣避我朝顯陵諱以元諱



稱如濂溪之改名焉安氏世爲順興人考諱子祖諱永儒曾祖諱子美俱贈顯官以先生貴也妣剛州禹氏禮賓丞同正成允之女先生以癸卯生于興州之鶴橋第自幼端重寡言笑稍長好性理之學文章亦夙就庚申登第考官柳璩見其文歎曰他日必成大儒補校書郎遷直翰林院乙亥以監察御史出守尚州治妖巫之挾神惑衆者一方稱之己丑從忠烈王如元時朱子書新行燕都先生始得見之潛心篤好知其爲孔門正脈遂手錄其書又寫其眞像而歸甲午以同知密直司事除東南道兵馬使出鎮合浦撫



軍恤民州郡以寧丁酉僉議參理世子貳保先生以  
儒學歷試內外九斤異端聲稱赫然嘗題學宮詩有  
處處祈佛家家祀神而獨夫子廟庭草無人之歎至  
是築精舍於居第後奉孔朱眞像朝夕瞻謁以寓景  
慕仍號晦軒戊戌從忠宣王如元與學官辨論性理  
學官等敬歎曰此東國晦菴其見重於中國如此是  
行也先生有詩曰最是此生無限痛百年天下帝單  
于使當時懷慶臨川輩聞之其不泚頰耶噫先生之  
微意其亦可知也已庚子拜贊成事尋加都僉議中  
贊修文殿太學士致仕其在相府奏革私田省冗官



獎廉吏擇守宰賑貧乏以安百姓時學校蕪廢文教墜地先生既獻宅于朝以爲國學而納土田臧獲以供學徒又議于兩府請令朝官各出銀幣有差歸諸養賢庫以贍學田以餘貲付金文鼎等奉先聖及七十子像于中國而并購祭器樂器六經子史以還且薦李懌李瑱等爲經史教授又以文諭諸生曰聖人之道不過日用倫理爲子當孝爲臣當忠禮以制家信以交朋修己必敬立事必誠而已彼佛者棄親出家蔑倫悖義卽一夷狄之類近因兵戈之餘學校頽壞士不知學學者喜讀佛書崇信其杳冥空寂之旨



吾甚痛之吾嘗於中國得見朱晦菴著述發明聖人之道攘斥禪佛之學功足以配仲尼欲學仲尼之道莫如先學晦菴於是禁內學館內侍三都監五庫願學之士及七管十二徒諸生橫經受業者動以千數而朱子之學始行於東方矣癸卯復拜贊成事甲辰以都僉議中贊致仕丙午九月十二日卒贈諡文成道德博聞曰文安民立政曰成忠肅王戊午命圖形文廟明年從祀東廡我朝中廟時慎齋周文敏公世鵬守豐基卽先生講學之地創書院退溪李文純公滉增定學式又依白鹿故事請賜額紹修此實



我東書院之始也嗚呼先生之有功斯文凡我環東  
士數千里雖愚婦愚夫亦皆知其受罔極之恩矣固  
不待贅說而惟其遺集團隱諸賢嘗請刊定而後皆  
逸其立言垂訓猶有未得盡詳者故論者往往以此  
爲恨然先生旣篤好朱子書得居敬存誠之要旨而  
其志也伊尹其學也顏淵是以其入乎耳存乎心而  
蘊之爲德行發之爲事業者如此其盛則彼以文辭  
之陋欲觀先生者其亦淺之爲知也噫萬世道統之  
傳其見於經者不過人心惟危以下十六字則今欲  
知先生之道觀於諭諸生文一篇亦已足矣又何必



多乎哉其興復於舉天下腥膻之中而終致汎掃平  
一之功賢於仁山遠矣其開創於海東則又有似乎  
濂溪之於宋也夫先生元配漢南金氏右司諫祿延  
之女墓從魯祔禮後配瑞原廉氏禮賓卿守藏其考  
也墓失傳今設壇先生塋右金氏生一男五女男卽  
于器贊成事文順公女壻知開城府事文頊判典客  
寺事許綬通文署錄事朴璿直史館韓守延贊成事  
貞景公金士元後孫甚蕃不能盡記銘曰  
嗚呼中州若無仁山孔朱之道孰傳海東若無先生  
孔朱之學孰宣盍觀羅麗千百餘年殷師遺教寂無



聞焉允矣先生海東夫子廓掃鬼佛興創聖軌甯破  
頑陰月照寒水大德之原衣履安是金安可掘漢宜  
乎祀矧茲大道昭焉日星嗟我八方曷不提醒屠維  
作噩陽月日後學德殷宋炳華謹述

神道碑銘

并序

以學問道德從祀文宣王廟庭上自國庠下至八路  
三百州縣莫不尊敬而俎豆之者獨有辭弘儒崔文  
昌安晦軒鄭圃隱本朝五先生而若其倡學之功  
實自文成公始王氏之興士未知學崔文憲設九齋  
導後生世稱海東夫子其於務本抑邪之實則未之



聞也降及季葉滅裂陵夷學校頽廢無復有振迪導  
率之方士之學者率皆逃於釋氏公倡明正道斥詆  
異教慨然以興學育才爲己任篤行力踐模範一世  
誨人有序必先以孝悌忠信性理之學於是始行一  
洗三韓舊染天理之晦而復明文風之熄而再作其  
誰之力耶若公者誠可謂東方道學之祖有非僻弘  
儒崔文昌所能顏行而史臣乃曰公之從祀以置贍  
學錢何其陋也公諱珣初名裕至本朝避一顯陵  
御諱以初名行密直副使版圖判書致仕贈太師門  
下侍中孚之子祖永儒贈樞密院副使曾祖子美保



勝別將贈神虎衛上護軍世爲順興人太師娶禮賓  
丞同正禹成允女生公登第元宗朝歷揚中外官至  
門下侍中致仕卒享年六十四贈諡文成初置贍學  
錢也卿大夫出銀幣有差密直高世自以武人獨不  
肯公曰夫子之道垂憲萬世臣忠於君子孝於父弟  
恭於兄是誰教也若曰我武人何苦出錢以養爾生  
徒是無孔子也其可乎世聞之慚屈公出私財修黌  
舍又納土田臧獲以供學徒購畫先聖及七十二子  
像于中國企求祭器樂器六經諸子史來且請置經  
史教授都監使以誨後學於是禁內學館內侍三都



監五庫願學之士以至七管十二徒諸生橫經受業者動以數百計特授行省員外郎海東儒學提舉以褒之雖謝事家居至於興學育才未嘗不倦倦公少好學研究義理克治旣嚴表裏一致莊重和溫人皆畏敬及晚年造詣益深推尊晦菴以爲功足以配仲尼欲學仲尼莫如先學晦菴常掛遺像以致景慕遂自號晦軒其樂道力學如此至葬七管十二徒諸生莫不素服路祭忠肅王命寫眞置文廟特令從祀及至我 獻廟以公爲有功於斯文命其後於軍籍無所與 中廟朝豐基郡守周慎齋世鵬卽公平日讀



書之地爲創書院及退溪李先生莅郡上書方伯以  
聞于 朝賜額紹修仍 命太學士申光漢記之又  
賜經籍以示敦崇實東國書院之始也公先娶右司  
諫金祿延女後娶禮賓卿廉守藏之女生一子五女  
子曰于器贊成事順平君順平生政堂文學順興君  
文淑公牧文淑生政堂文學順城君文惠公元崇文  
惠生刑曹典書景質公瑗奕葉冠冕至今不絕爲世  
大族公墓在長湍府松林縣大德山北子坐午向之  
原墓前舊有碣殘泐不可讀順陽君夢尹卽公十三  
代孫也懼其久而湮滅莫識與其子應昌及諸宗人



攻石封植後學聞風者莫不樂爲之助遂以麗牲之  
刻屬世濂世濂頓首曰小子何敢焉即公學問道德  
赫赫若列星麗太空庭享百世直與文宣王之教相  
終始何用文爲遂略序其梗槩如左若公之立朝事  
業則有信史存銘曰

昔在麗代異教是崇不有先覺孰開羣蒙允矣先生  
服膺晦翁教爲己任學主敬忠橫經發難多士攸同  
各資墳典上自王公學校再新大闡儒風充養有素  
克篤始終鏗鏘鐘鼓思樂泮宮從享于庭百世所宗  
大德之原麗水奇峯於萬億年香火靡窮石可使泐



名則益隆行者必式若堂之封 皇明崇禎十二年  
己卯冬後學通政大夫成均館大司成知製教金  
世濂撰

東國故箕子治衍洪範以敘彝倫用夏變夷而後覺  
者鮮焉致陷異教凡千有餘年高麗之季知尊聖道  
國庠鄉序文風蔚興羣賢輩出變而華之又六百有  
餘年余嘗謂其間必有豪傑之士依故卒能變其難  
變也日有金鶴洙鄭闇朝李晚燧諸紳士送其舊僚  
尹憲燮抱晦軒實紀一部走水陸七千里訪余於關  
里古宅徵晦軒之神道碑文以余爲聖嗣也按實紀



而三復之乃恍然於能變千有餘年異教而明聖道  
至六百餘年者實爲我晦軒安子也安子高麗人也  
入中國見朱子書知爲聖門嫡傳嘗曰欲學仲尼先  
學晦菴遂摹聖幀及朱子真安於宅後精舍朝夕瞻  
謁仍獻宅爲國學納土田臧獲備廩供役復遣人于  
江南奉先聖及七十子之像併購禮樂器六經子史  
以東於是乎文物之盛禮俗之美無愧爲箕封故域  
列王崇報諸儒尊奉上以躋聖廡下以享書院稱東  
方理學之祖殆非溢美也安子諱珣初諱格謚文成晦  
軒其號也葬在朝鮮國長湍府大德山子坐原銘曰



東國有安氏子世稱晦軒先生宗夫子學晦菴興儒  
化道以明大德山兮彌崇閱千世體骨寧多士慕我  
亦慕撫其實以爲銘孔子誕降二千四百六十八年  
丁閏二月日孔子七十六代孫世襲衍聖公孔令貽  
再拜敬題

舊碑在墓庭年久字頑城內紳士  
博詢僉議復徵銘于魯錫堅墓洞

順興鄉閭碑銘并序

古順興治北白雲洞有文成公祠誌所謂紹修書院  
是也又邑墟南有安氏故宅遺址去祠宇七里其傍  
有小澤謂之洗硯池爲古跡至今邦人指而敬之故  
事相傳文成公皇考太師諱孚太師之王考神虎衛



上護軍諱子美實二祖舊居云安氏之大實自上護  
軍始樹德而發後世祠以爲始祖今築祠壇於此置  
祭田每十月上日報祀以太師配之又東一里有安  
氏四賢井在嘉靖中周慎齋世鵬立石書其事稽之  
譜牒三韓之甲族諸姓貴大者非一而大賢之族多  
名人達官者獨稱安氏前古特盛云文成公之世當  
高麗高元烈宣之際其事著於載籍又湍州大葬銘  
可見上之七年春安氏子孫立閭表於古里不但  
安氏羣子孫所相告而表識者而已雖百代之下凡  
過此閭者亦不忘大賢之遺教知所敬矣銘曰



閭表之碣碣欽上哲者威如神如祠壇之舉舉推厥  
初者虔如禋如嘉善大夫行成均館大司成黃昇撰  
資憲大夫議政府左參贊金光煜篆金縢書

殷太師遇明夷而東東土丕變然得太師之道以及  
人者惟我安先生一人高麗高宗三十年癸卯實宋  
理宗之淳祐三年公以生去太師數千餘歲賢後何  
限應生者天也羅麗之際佛教熾麗爲其後太學惟  
淳屠氏是倭公發憤作詩以遏異端扶吾道自任忠  
烈朝位贊成事時養賢庫儲竭公建議令朝臣出銀  
幣歸太學有餘付行人入中國畫夫子七十子像金



購祭器樂器六經羣聖賢書聿修俎豆廣勵學徒橫  
經問難之士動以千計儒風大振聲聞天下公爲人  
莊重安詳其學以誠敬爲務常掛朱子像景慕學可  
知己其後圃隱鄭先生起本朝眞儒輩出上繼太  
師下開羣賢抑邪扶正皆公之力也若論道統公其  
祖矣公諱裕諡文成職壁上三韓三重大匡都僉議  
中贊修文殿太學士老壽六十四子孫世顯世系事  
業德行文章在本傳此其大略也公配聖廟於麗朝  
我太宗下教曰安某後雖孽勿役軍以崇乃祖著  
令甲東國舊無書院中宗時慎齋周世鵬宰豐基



創于治之北白雲洞以祀公公邑人 賜額紹修安  
侯應昌公十四世孫也後公卒三百五十一年謁公  
像于書院訪公舊墟集宗人喟然歎曰他人尚慕吾  
祖矧子孫坪里村吾祖舊墟不可無一片石僉曰諾  
又曰吾祖先墓皆封表有不知者兩墓文成公考諱  
孚職侍中侍中公祖諱子美職護軍是已護軍公實  
我始祖安之內外後裔冠冕相望其誰之慶耶吾欲  
別設一壇祭兩祖于每十月之朔朝僉曰諾於是安  
侯與宗人各出財立文成公碑設護軍侍中公壇夫  
孝莫大於追遠安侯此舉其可謂孝也安侯字興叔



與余善銘曰

坪里之村先生之墓白雲之院先生之祠哲人已遠  
緬莫之追瞻彼桑梓後孫孝思嗟爾後孫爾祖念之  
念之伊何視此銘辭 皇明崇禎丙申五月日後學  
通政大夫承政院同副承旨鄭斗卿撰

松京遺基碑銘

并序

孔之闕里朱之新安歷千萬世猶傳雖無表可也至  
於後世名賢生長畱芬之地或未免昧昧然無所尋  
後學之嗟惜裔孫之傷感當如何哉此閭表所以權  
輿也晦軒安先生生於衰季之日忠義大節既足以



動中華而化蠻貊倡起聖學之功又有以闢異教而  
回世道遂令海外偏邦之人免爲夷狄禽獸之歸而  
禮樂文物之盛侔擬中夏者其誰之功歟世或有以  
崔孤雲辭弘儒并稱之者嗚呼豈足以知先生哉文  
廟之祀自是斯文之美事院廟之享東方創見之盛  
舉而令子賢孫聯芳襲美於四五百載之後從古儒  
先倡學明道爲世儒宗者何限而天之所以福慶之  
者於先生特厚何其休哉先生生長興州地從宦邸  
舍在於松都良醞洞其遺風流韻有以起後學欽慕  
景仰之誠而舊基變爲野田人之過此者未嘗不指



點遺墟徘徊瞻眺而感慨繼之矣先生十四代孫善  
山府使安侯應昌懼其久而遂失其傳率宗人旣立  
表於興州舊基今又立石於良醢洞口其追遠之孝  
世罕其倫云先生諱裕仕高麗歷事元烈宣三朝官  
至壁上三韓三重大匡都僉議中贊修文殿太學士  
謚文成公若世系子孫言行事業之懿具在傳狀之  
文今不贅銘曰

先生之澤喬嶽大川先生之道星日麗天異教是闢  
孔道以明舊染旣湔新者全經高風雖遠學設猶傳  
新安故基闕里風煙星移物換芳躅如昨石以銘之



過者必式青蛇中夏後學豐山金應祖撰

按麗史本傳文成公諱裕嶺南順興人初仕元宗世  
歷事三王爵至都僉議中贊修文殿太學士麗俗尊  
事浮屠學校衰廢乃建議增學錢入中國取五聖十  
哲諸子圖像以祀之修祭器樂器之物具經史諸子  
百家書薦文學之士李懽李瑱掌經史教授於是禁  
內學館內侍五庫學士七管十二徒諸生皆學焉學  
校之興於斯盛卒謚文成後忠肅六年從祀文宣廟  
輿地開京古跡姜仁憲公卽贊安文成公裕李文靖  
公稽韓文敬公脩古宅在良醢洞而已今有安氏苗



裔前善山府使應昌之閭巷碑於街口磐石上皇  
明崇禎甲戌十月日立後學通訓大夫行司憲府掌  
令許穆撰篆外裔通訓大夫行尚瑞院直長金葵書

松京遺基碑閣記

我東僻在海隅箕聖之遺化浸遠佛氏之邪說橫行  
逮夫麗朝之中葉壞亂極矣晦軒安先生生於其時  
有詩而片之談笑而麾之捐私財而創學宮孔像朱  
真儼然在堂而吾道始與之東來當世有志之士聞  
風請學者動以百數暨夫圃隱先生繼淵源而闡明  
之啓我朝右文之治伊來四百有餘年羣賢相傳



儒化不興典章文物燦然具備天下咸稱以禮義之  
邦者繫誰之力微先生環東土數千里將未免被髮  
左衽闢異端而扶正道繼往聖而開來學其功反有  
賢於孟韓者矣先生古宅在本府西城門外里許之  
良醞洞而世級浸遠滄桑屢變後孫順原君應昌懼  
其愈久而愈失其傳植一片石於舊址蓋壽其傳也  
然而樵牧之侵風雨之磨字畫剝落殆不可辨雲仍  
之在近地者經營碑閣蓋亦有年而迄未遑矣丁酉  
十月京居安垞先生十九代孫也種種西關之路瞻  
拜遺墟慨然歎曰吾先祖道德文章實爲百世之宗



師而遂使遺墟片石未免上兩傍風是誰之責也爲  
孱孫者寧不蹙蹙惶愧於心也遂與諸宗會議垞出  
三百金嶺南行翼出五十金諸宗亦各隨力出錢不  
逾月而丹雘煥焉觀瞻蔚然昔之埋沒於荒煙中者  
雖在莽蒼之遠知其爲大賢遺址而必式焉是閤矣  
止壽其碑也實有合於尊道之義也又立下馬碑於  
路左以爲致敬之所又付五十金於市廛以爲他日  
重修之資安垞諸賢之誠力其可尚也而屬余爲文  
以記之顧余眇末後學何敢妄議於先生前後文而  
特嘉雲孫慕先之誠略敘顛末如右云爾

崇禎紀



元後四丁酉十月日後學嘉善大夫行開城府留守

李彥淳記

祠院

紹修書院

開基祝文

維嘉靖二十一年歲次壬寅八月戊寅朔十五日壬辰豐基郡守周世鵬謹遣前訓導安哲輔敬祭于后土之神滌邪墟開正基立新廟尊先師惟明神其右之

奉安眞像跋



公之遺像舊在順興府鄉校丁丑之變府廢而移安  
于漢都大宗之家余獲一謁於公之宗孫前注書安  
珽氏家望之儼然卽之溫然信乎大人君子之貌也  
如得親承警欬於心終不忘癸卯三月注書聞吾立  
廟陪影幘南行奉安于郡西樓八月癸未始得祇安  
于新廟公之故居在順興廢府城南毀瓦頽垣已無  
可尋新廟在城北卽宿水寺舊址相望僅一牛鳴地  
公少時嘗讀書于此尤不能不爲之興懷竹溪遠其  
左小白雄其右雲山原水誠不讓廬山嗚呼公之歿  
二百三十七年而始建廟其影幘北去八十七年而



還故鄉豈亦數也歟其出都門也內外雲仍之在朝者四十餘人設供帳祖道于門外其奉安于廟也舉鄉父老及子弟百餘人齋沐虔迎至於傾城簪觀亦斯文一盛事後來繼今者誠不以愚鄙所建爲忽而一心致敬於公廟使賢士皆樂藏修於書院則必有心會晦軒者而其興起斯文亦未必無小補云爾周世鵬謹跋

上周慎齋世鵬書

安珽

總

僕依約奉陪文成影幘今抵丹陽聞城主沿牒遠出鼓望無何只欲遲畱數日使鄉中父老指導迎入姑



安于公館潔處僕則卽由禮安指東京歷密陽向晉  
州爲計耳奉影幘出城之日凡文成內外雲仍之在  
朝者四十餘人供帳都門設祭拜送一時盛事無大  
於此亦是增光城主至意也今到吾鄉適值城主不  
在欠禮莫甚潑恨潑恨且此廟祀之事朝中莫不歎  
服盛意若會於中道則豈徒蘇敘可慰乎金照癸卯  
仲春晦日珽謹拜

與牧使安瑋承旨安珙書

周世鵬慎齋

頃見安注書書獲承諸公奉送影幘皆出都門之語  
潑荷潑荷晦軒公爲吾東方道學之祖其爲教一洗



三韓之陋爾來二百四十年天理之復明文風之大  
興其誰之力耶如僕每切景仰叨守是邑實出菲望  
到官來未三日先訪竹溪距順州舊城一牛鳴地有  
宿水寺廢址卽安文貞所賦靈龜形勢縮山頭下有  
臨溪百尺樓魯瑱所詠寒堆岳色僧扃戶冷踏溪聲  
客上樓者是也雲山原水誠不讓廬山白雲常滿洞  
壑敢名其洞曰白雲徘徊興感始有立廟之志今掘  
土開基其祭地祇之辭曰滌邪墟開正基立新廟尊  
先師惟明神其右之云掘之未尺餘得鍤金百二十  
斤欲爲祭器付之守廟者亦慮爲奸偷所窺使折價



可準布十同卽送洛下令買四書五經二程全書朱  
子大全大學衍義通鑑綱目及他書之可以衛斯道  
者藏之書院爲後日諸生探討之資敢問尊意何如  
業已立廟廟前立書院兩事已畢所欠者書冊耳伏  
乞指揮又取廟倚公田之爲私者立爲位田又別置  
寶米四十石爲諸生藏修之備釜鼎盤皿之用亦皆  
無缺又印經書理學若干帙藏之儒林之喜斯文者  
或有以好書相遺金錄爲一卷將欲楷書數帙畱一  
本於此奉送一本于高門但衰病日甚披霧無期悵  
惘日月世鵬拜



答周慎齋世鵬書

安珖

備審示意吾門之遇城主真萬幸斯文之遇城主亦實大幸斯道之流行雖曰無所間斷亦必有扶持者而後大明於世吾先祖雖有功於斯道至今賴之若非好善之至誰復爲斯道敬服而興起之歟備詳措置之事不勝感愴于中雖使他人聞之亦豈無歎服之心哉吾鄉山水蘊奧可堂之地非一而必卜於此至得賀書之資其亦天地感公至誠而助成之歟神異之事雖非儒者所可道神異之驗顯出若是斯豈人力所致歟非至誠其孰能與於此乎公須揮灑巨



筆記示後人以彰天地感通之理幸甚白雲扁院甚  
好若金示堂名則欲求大字於中原以揭之耳 嘉  
靖二十二年月日亥拜

與安竹牕珽書

周世鵬

文成公廟事已畢月十一日奉安影幀舉鄉父老無  
一人不隨到者士族子弟庶民俊秀凡十歲以上皆  
令先往結襪虔迎觀者如堵祀以潔牲先令小童誦  
竹溪辭三章陳幣薦俎次歌道東曲九章分歌三獻  
各三章籩豆有秩庶事無缺區區賤懇庶幾降歆適  
大寶員外亦參亞獻豈非天幸歟前來四書五經及



少微通鑑諸書冒積兩行千里不一沾濕雖曰神明所扶持包裹貴寵其勤亦至向微惠力何得及此殊感殊感但晦軒公平生所尚師者晦翁其全書及語類尚未賀致寤寐跂渴綱目固所願賀恐其價翔而難及於他書也伏惟明君益加措置幸甚且晦翁之所師者二程僕南來時欲乞貴藏全書善本告方伯刊行請之再三而不得歸而思之豈仁人之於外物有一查吝萌歟抑吾之所踐者未足以回動仁人耶如是者今且三年而未解感焉今之方伯李公亦晦軒之徒也刊是書而行是世卽其時也公猶不聽吾



言則亦天耳命耳僕平生喜求書未有聞而不求求而不披者今旣白髮不得有是書頃年借取貴藏一窺而還之茫然如夢覺之後記夢不得爲之輾轉也噫今之如僕者何限不亦矜甚乎以公之仁竟不寄是書廣惠後學則誠天耳命耳時不可易得敢倒區區惟君其圖之月日世鵬頓

春秋享祝文

克慕晦翁吾道東矣猗歟敬學百世之宗

春秋享改定式

退溪續集

謹按竹溪誌本圖右二豆用軟蜜果周氏之意豈不



以文成諸公東人也循國俗而祭用蜜果固爲無妨也耶雖然東人旣祭於學則所當倣古而行豈可以蜜果熟味用之於學中乎且果而盛于豆尤非所宜故今去蜜果代以鹿醢左邊亦對此而去果代以魚鱠則左右邊豆醢殖兩兩相對無參差矣若鹿醢魚鱠有未備則寧以芹殖代鹿醢而仍以果代魚鱠庶不失禮之本意蜜果恐不可用也 嘉靖己酉秋郡

守李滉識

右春秋二享禮卜季月上丁上丁有故則改卜中丁

備三獻官六執事

有司前期七日告本官及斯文定獻官執事



書院舊有文成公廟祭笏記云是周武陵所定其議大抵務從簡易未免有徑率苟且之病其間數條又有與竹溪誌祭式自相抵牾者由是言之殆非武陵所定也今考據釋奠儀及祭式稍加訂正並錄其所訂之意于後將以就質於院中諸君子而去取之其可行與否非滉所敢僭議也

一謹按祭式行上香禮降復位乃行初獻禮蓋釋奠盛禮上香奠幣與初獻自爲兩節所以重其事也惟朔望奠及先告事由等祭則上香與初獻合爲一節一時並行所以從簡也今此廟祭無大於春秋享罔



當備儀而舊笏記旋上香而旋初獻是爲大儉今從祭式及釋奠儀改定

一釋奠儀及諸式皆先飲福後受胙舊笏記則先受胙後飲福非禮之本今從儀式改定

一釋奠儀受胙後四拜爲受禧拜也撤籩豆四拜爲祭畢拜也凡禮之節皆有意義不可徑削祭式則本不載拜跪之節故終之曰餘如校而已欲人考禮而行之猶可也舊笏記直削受禧之拜只於撤籩豆後行再拜非也今改定

廟享圖

出退溪續集



左邊

鹿脯 栢子

魚鱠 乾棗

燭

爵

門

○ 配位

神位

簋稻 簋粱

雞 幣

俎

香

爵

門

○ 正位

簋黍 簋稷

腥 醢

右四豆

鹿醢 韭菹

魚醢 菁菹

燭

爵

祝

門



凡於祭也器欲其潔牲欲其肥酒欲其香至於脯果醑醢亦須各極其精故其物寧約夫神之所享者誠也厥臨孔昭

可不謹乎

周慎齋所定祭式踐

配安文貞公安文敬公告由文 周世鵬

維嘉靖二十三年歲次甲辰九月丁酉朔十一日丁未某官周世鵬謹遣生員黃彬以舍菜之禮告于先師文成公伏以文貞公安軸其訟王于元也大節已著其出牧于尚也孝懇彌篤究其所學淵源有自文敬公安輔人皆急於邪欲乃獨闊於事情排佞鬼而



正氣塞乎兩儀無甌石而清風吹乎六合若無私淑  
何以及此敢以二公配謹告

竹溪辭三章

竹溪在東小白在西公之廟兮在其間白雲滿洞兮  
前路迷溪有魚兮山有柏是公舊遊兮胡不歸歸兮  
歸兮毋使我悲

小白在西竹溪在東山有雲兮水有月古今兮是同  
公之來兮駕玉虬或騶以紫鸞酌我醴兮侑我誠庶  
幾歆兮盡爾歡

公昔未生兮斯文晦太倫墜地兮雲煙昏自公一出



今洗三韓白日青天今吾道尊有廟枚枚兮公像在

中竹溪彌清兮小白彌崇右上海後樂歌

道東曲九章

伏羲神農黃帝堯舜再偉繼天立極景幾何如

人心惟危道心惟微惟精惟一允執厥中偉乎

聖人之心法이다문잇분니이다

禹湯文武皋伊周名再偉君臣相得景幾何如右三章初

獻時樂歌

下土茫茫利上帝是憂하圻頂大人을洙泗우

히나리우시니偉萬古淵源이그찰서입사샷다



顏生四勿曾氏三省仰高鑽堅瞻前忽後偉學聖念  
勞景幾何如

率<sub>하</sub>리天命之性養<sub>하</sub>리浩然之氣<sub>唱</sub>再偉至誠無息

이<sub>아</sub>本이<sub>니</sub>이다<sub>右三章亞</sub>  
<sub>獻時樂歌</sub>

光風霽月瑞日祥雲<sub>唱</sub>再偉<sub>하</sub>처딘선날엇데<sub>하</sub>아니

아신고

人欲이橫流<sub>하</sub>아浩浩滔天일시一千五百年에時

翁이<sub>나</sub>父다敬으로本을세워大防을망가라치네

偉繼往開來아仲尼나다라시리잇가

三韓千萬古에眞儒랄나리오시니小白이廬山이



오竹溪卜濂水로다興學衛道호小分에일이어니  
외尊禮晦菴이그功이크호다偉吾道東來景幾何

如右三章三獻時樂歌

### 白雲洞致敬說

余觀大小白諸刹其棟宇至有自新羅流傳者彼之  
所尊者卽淪滅三綱之鬼而其徒之信守如此况文  
成公倡學校明三綱以扶豎宇宙之棟樑而其故里  
一廟尚不得久保則不亦爲文獻舊邦父老斯文之  
大恥乎誠使諸父老諸斯文一心致敬於此則吾知  
其廟之久保也無疑矣言之重詞之複不知自止者



猶懼其守者之不謹反爲大小白諸僧之所笑

院規

一曰謹祀二曰禮賢三曰修宇四曰備廩五曰點書  
夫不謹則祀不享不禮則賢不至宇不修則必壞  
廩不備則必匱書不點則必散五者不可以廢一  
也

斯文統檢有司監掌

學田所出每年十一月院長成冊三件一件申于  
官一件報于斯文一件畱置院中實米所納每年  
正月成冊三件其申報如前必存本取息而用之



若不待存本而先用其息則在民腹中而未納者  
有本之名無存之實須以先納者充存其本然後  
用其所息可也今夫列邑司馬所亦多置田立寶  
然而送迎婚喪之需或資於此故其久保也鮮矣  
若書院則必以養賢為主無他耗費然後庶可支  
久無大闕欠

別擇業文信慎者一人爲院長又擇一人爲貳共主  
院事主院者若遠居則雖有至誠勢不得常常顧  
之必致荒廢須以五里人爲之可也某初於舊興  
得一士金仲文俾掌文成公祠事其所居至近其



用意甚專刊荆榛開廟院實賴其力至於典祀禮  
賢亦終始一心使之久主廟院必不中廢某少時  
讀書諸山間見有僧之創寺者名曰化主護其寺  
甚於護身觀其志雖所謂削足矐眼而不顧也夫  
僧猶然況於士人乎余由是益信金生之慎護也  
苟無大故雖終身仍掌可也然若怠於禮賢使訑  
訑之色拒人於千里之外則亦不可一日爲是任  
也誠在諸斯文審察何如耳

春秋大亨例卜季月上丁上丁有故改卜中丁  
凡舍菜先聖必於春秋仲月而此則卜季月者公



既配享仲月而上巳之清明重陽之佳節卽公平  
生所浴禊遊賞於此者追而祭之公必樂而降歆  
祭之日盡會一鄉父老斯文秀士於溪上而爲飲  
禧禮相與諷詠而歸則所謂神人以和者必於此  
而得之矣

備三獻官六執事

有司前期七日告斯文豫定獻官及諸執事

致齋日獻官點曬藏書省視牆宇虧漏會計米穀什  
物受禧日衆斯文共察之

若司馬有司則每節必檢院中有司則每月必檢



邑宰子弟不得畱滯貽弊

畱滯則不但所率之兵侵弊守直之家漁食鄰閭  
橫生憤怨其漸有不可勝言者甚者不敬廟庭不  
謹書院視淨室忠淫視華壁忠穢其毀瓦畫墁未  
必不自子弟始嗚呼世有父兄仁而子弟未仁者  
亦有子弟仁而父兄未仁者聞吾言豈不爲之回  
動乎然固有父兄子弟俱仁者矣而亦有父兄子  
弟俱爲未仁者如吾望何

邑宰子弟不得擅便書冊

擅便則必有因緣偷竊之弊子弟之心父兄豈盡



知之若攜出院門或致遺失則人必曰偷竊也其  
貽愧當與竹溪同其流也爲父兄者可不警哉爲  
子弟者可不懼哉某故不令子弟寓于此欲防其  
源也然有大志而無書冊積誠來學之君子則亦  
不可一切拘於此例也

禁射侯遊宴

鄉飲酒及斯文雅飲則此固其地也至於浮浪之  
輩不解文字而醉紅裙拍肩執袂歌呼嗚嗚必事  
淫佚而爲悖者則不但爲溪壑之所羞將必有損  
於廟院亦須從容忠告勿使相近可也若梟禁則



反遭不逞之怒不如不禁之爲愈也然聞吾言彼必自避亦不待禁也

復守直四家人不得役官不得奪

今之列邑爲私泮者亦多矣不奪彼而取此則是武人高世之罪人也

凡入院之士司馬則如入太學其次初試入格者雖非入格其一心向學有操行而願入者有司稟于斯文而迎之

夫開院固欲迎賢若濫入則不肖者間之非徒耗廩將有損於書冊什物愚者至而賢者必不肯來



亦荒廢廟院之一漸也其擇尤不可不謹也

別置入院錄凡入院之士必自錄姓名且記其來寓年月

夫題名者豈偶然哉後來者必披案歷指曰某也學而爲己某也學而爲人某也生而有愧某也沒而無怍其窮達雖殊而賢愚亦遠嗚呼可不懼乎可不勉乎

白雲院創建識

周先生於辛丑六月日下車基州以興學務農爲先而鄉校頽圯基址陝隘方謀移建以旱災未果也時



有進士黃君彬納米五十石先生於是請于方伯李  
公靖而下地新作制度極備越明年壬寅又請於方  
伯林公百齡林公大施魚鹽茲又勅立文成公廟于  
竹溪之上又建書院於其前將以餘貲設藏修之廩  
不愜於用翌年癸卯李公彥迪繼林爲方伯且施鹽  
藿之惠黃君又納四十五石之租仍是立寶米若干  
置學田若干以屬于院其始開廟基也掘地得鍬金  
百有餘斤輸京師賀書冊以藏于院凡新校勅院戒  
時義乘農隙役官屬不勞民上資方伯之力而黃君  
之力亦匪細焉吾觀世人費私財助僧舍傾家產供



佛飯僧有識者亦或不免也今先生之經營兩地皆尊師立教之事而異於寂滅之道則凡有秉彝之性者固當慕義出力以爭趨矣反爲譏詆猶恐不及而惟黃君能焉茲所謂善人者非耶嗟乎興之一區僻在山中自革廢以來里之良士俗無廉恥之風而不識仁義爲何等事也先生建廟以尊先師立院以導後學誠以爲本敬以爲主不求聞於人而人信之不數年間士知向方興起自新先生之有功於興人豈淺淺哉夫豈獨一興而已由一興而四方由四方而一國將見有不可勝言者矣其於修治之學化成之



方未必無大補焉感先生好善之心歎媚嫉排毀之  
舌記其本末以見不費官財不用民力之意也 嘉  
靖丙午三月甲子金仲文識

### 書院記

白頭山雄峙漠北其南支騰鶩沿海遙遙到江原道  
磅礴而最奇秀者曰金剛南至三陟界結爲峯巒高  
聳天表者曰太白東延袤而南藏縮不洩者曰小白  
支股回轉洞壑幽濶又有清流映帶其前者曰竹溪  
溪上舊有巨府曰順興今合於豐基郡其扶輿淑氣  
固當鍾而爲大人君子扶運興化以壽斯道於不朽



者也我文成公諱珣實稟異氣生于是地自少好性  
理之學律身以正當高麗元宗朝登第從忠宣如元  
官至中贊時學校頽廢斯道將至於墜地公奮不顧  
身以爲己責不惜私財盡心營建學舍納其臧獲以  
供學徒其有功於文教如此晚年常掛晦菴先生眞  
以致景慕遂號晦軒及卒諡文成配享文廟時七管  
十二徒素服哭祭於路噫吾道之廢興關於世教之  
汙隆豈特麗業之衰賴公之力而不墜也我國家興  
運以來學校之盛亦不爲無助焉此豈非仁人君子  
之效也歟今郡守周侯世鵬有志好古嘗拜公之遺



像于其後裔前注書珽私第及守是郡下車先訪晦  
軒故里其遺址在順興廢府城南破礎蓬蒿滿目興  
懷感慨不歇杖履逍遙訪古揆勝由廢府一牛鳴地  
又得所謂宿水寺故基卽文成少時讀書處也侯尤  
有感於心於是鳩財立廟又立書院爲近邑諸生藏  
修之所當初開基掘地尺餘得鋤金百餘斤不知爲  
何代物也遂販貨鬻經史以業學徒其亦奇矣哉侯  
之樂善好古之心槩可見矣文成公我祖母安氏六  
代祖也今以外裔獲聞先祖德業流傳久而彌新不  
勝悲感聊志本末云八代外孫成世昌記



上方伯沈通源書

李滉

豐基郡守李滉謹齋沐上書于觀察使相國閣下滉  
疾病驚鈍守職無狀輒有愚悃敢效一得之愚伏以  
郡有白雲洞書院前郡守周侯世鵬所勗建也竹溪  
之水發源於小白經於順興廢府之中實斯文先正  
安文成公裕之故居也周侯之理郡以興學育才爲  
先旣拳拳於鄉校又以竹溪是大賢遺迹之所在乃  
就相其地經構書院凡爲屋三十餘間有廟奉享文  
成公以安文貞公軸文敬公輔配之而旁立堂齋亭  
宇以爲諸生遊處講讀之所掘地而得瘞銅若干斤



賈經史子集百千卷以藏之給息米置贍田使郡中  
諸生員管其事郡士金仲文幹其務招集學徒四面  
而至勸獎誘掖不遺餘力旣而周侯去郡文成公之  
後今兵判公玠適來按道謁廟禮士凡所以增飾作  
養之方極盡其慮役隸之充魚鹽之供靡不措畫使  
之永賴自是監司之來亦皆加意於此而獎勵之無  
敢忽矣夫書院之名古未有也南唐之世就李渤舊  
隱廬山之白鹿洞初立學宮置師生以教之謂之國  
庠此書院之所由始也宋朝因之而其中葉猶未  
盛天下只有四書院而已渡江以後雖當百戰搶攘



之日而閩浙湖湘之間斯文蔚興士學日盛轉相慕效處處增置無廢不復非獨我文公之於白鹿爲然也胡元竊據猶知首立太極書院以倡天下 大明當天文化大闡學校之政益以修舉今以一統志所載考之天下之書院總有三百餘所其不載者想尤多也夫自王宮國都以及列郡莫不有學顧何取於書院而中國之所尚如彼何哉隱居求志之士講道肄業之倫率多厭世之器競抱負墳典思逃於寬閒之野寂寞之濱以歌詠先王之道靜以閱天下之義理以蓄其德以熟其仁以是爲樂故樂就於書院其



視國學鄉校在朝市城郭之中前有學令之拘礙後有異物之遷奪者其功效豈可同日而語哉由是言之非惟士之爲學得力於書院國家之得賢亦必於此而優於彼也古之明君知其如此故宋太宗之於白鹿洞因江州守臣周述建請旣驛送九經又擢用其洞主明起其後直史館孫冕以疾辭于朝願得白鹿以歸則從其請理宗尊尚儒學如考亭書院之類皆賜扁額以寵榮之是則中國士風之美非獨士之自美亦由於上之所養也惟我東國迪教之方一遵華制內有成均四學外有鄉校可謂美矣而獨書院



之設前未有聞此吾東方一大欠典也周侯之始建  
書院也俗頗疑怪而周侯之志益篤冒衆笑排羣謗  
而辦此前古所無之盛舉噫天其或者由是而興書  
院之教於東方使可同美於上國也雖然混竊以爲  
教必由於上而達於下然後其教也有本而可遠可  
長不然如無源之水朝滿而夕除豈能久哉上之所  
導下必趨之一人之所尚一國慕之今夫周侯之所  
作雖甚奇偉安公之所成亦甚完密然此特一郡守  
一方伯之爲耳事不經宣命名不載國乘則恐無  
以聳四方之觀聽定衆人之疑怪爲一國之效法而



傳於永久也。滉自到郡以來，於書院一事未嘗不欲盡心焉。魯拙無能，加有羸瘵之苦，略不能振奮激勵，以爲多士之勸。氣豔日就於陵替，朋徒漸至於怠散。大懼昔賢流芳之地，吾東人初見之美，遂至於衰墜。妄欲陳乞于朝，冀蒙萬一之幸，而地遠言微，恐懼而不敢發也。伏惟閣下任旬宣之寄，崇教化之本，凡係一面之利害，亦宜陳達。況此聖世宏撫之所關乎！倘閣下不以詢莛爲不足取，而芟正之轉以聞乎上，則欲請遵依宋朝故事，頒降書籍，宣賜扁額兼之給土田，臧獲以贍其力，又令監司郡守但旬檢其作



養之方贍給之具而勿拘以苛令煩條至於爲郡守而鬬茸癘疾如混者閣下亟宜貶黜而請于朝別揀儒臣之有德望經術節行風義可爲士林矜式者爲之郡守以任其責如是則書院非止爲一邑一道之學乃爲一國之學矣如是則教原於君上士樂於來遊可傳之永久而無壞矣

別紙

謹按故事凡書院必有洞主或山長爲之師以掌其教此一件尤當舉行但此擇於遺逸之士或閒散之員而其人才德望實有出類超羣懿然卓然爲一世



師表者乃可爲之如不得其人而徒竊其號則與今  
教授訓導之不識者無異有志之士望望然去之竊  
恐反有損於書院故今不佞請而此則在閣下之裁  
度獻替朝廷商量可否如何耳

賜額紹修書院記

竹嶺之東有順興郡郡之東有小白山山之迤邐而  
南來幽邃而窈窕者曰白雲洞竹溪之源發于小白  
而流經于洞斯乃古順興廢府之地而高麗安文成  
裕藏修之所也文成公篤學修身以明其志宦且達  
納其臧獲土田于國學至今賴之其有功斯文亦大



矣其子孫世居茲地代有聞人如輿地勝覽所載其  
故家遺教尚有存焉人思慕之愈久而不衰前郡守  
臣周世鵬雅好儒術爲郡數年專務以學教人勸建  
書院且爲文成立廟而祀之以順學者之心而興起  
焉初拓院基得瘞銅若干斤院且成購寶書史而藏  
之給息錢置贍田使郡士之有識者幹之於是學徒  
盛集非上舍與俊秀者不得列絃誦之習日以彬彬  
焉其後觀察使臣安珰乃文成之苗裔也又繼周守  
而經度之增益魚鹽之資俾有役隸而給之將以永  
久而不廢斯甚盛事也而其所闕者郡守旣不請於



朝觀察使又不以聞非但聖世作成之美意鬱而不彰事不由朝廷名不載國乘又難經久後郡守臣李滉爲此而懼遂備錄勅院之顛末上書觀察使臣沈通源請以上聞願依宋朝白鹿洞故事賜扁額書冊以昭聖朝崇學樂育之盛觀察使乃以其書上聞上命大臣議而允之下其事于禮曹判書臣尹漑請以臣光漢名其院且記命名之義令校書館刊而頒之加給書冊郵而傳之上皆允之臣光漢聞命惶懼拜稽而獻其名曰白雲洞紹修書院臣竊惟爲學之道廢而不講久矣學而不講明其理



不知修己之爲何事既不能敬而直之於內况能義以方之於外乎此紹修之所以名書院也嗚呼三代之末聖王不作庠序學校雖存而上無躬行以導率者天下之學者貿貿焉莫知所宗仁義喪而明德晦矣孔子雖大聖不得君師之位乃與其徒講明爲學之道曰自天子至於庶人必以修身爲本其所以教所以學無非內外交修之道也天下後世翕然宗而師之孔氏之道衰而有孟氏者出孟氏傳孔氏之道而紹之者也其收心養氣之說無非反之於吾身其道雖大其要不過曰修己及人而已故其所居鄒魯



之邦至今歷千百歲而人猶慕之天下之徵文獻者  
必曰魯鄒後之賢者雖不及孔子孟苟有躬修之實者  
假其所居猶足以起學者之心況於身為君師而化  
由於國學者耶故人君所操轉移之幾甚微而其熏  
陶作成之效收於後者甚大臣乃於宋太宗見之矣  
漢唐魏晉以來非無學校之爲尚徒有其名而絕無  
躬率之實故其治效蔑蔑乎無聞太宗之爲君其躬  
行導率之實則臣未之聞也其轉移作成之效獨於  
書院見之太宗以天下之君取下國隱士之書院賜  
扁額書冊以振作之終宋之世眞儒輩出道學大明



以紹孔孟不傳之緒觀此則宋之作成之效若出於  
書院而不由於國學者何也是無乃天下國學猶未  
若李渤躬修之所耶今者聖明在上文運方亨守  
臣周世鵬之建置書院李滉之請於朝而獎勸之  
者雖出於人爲而天固啓之也我殿下心誠道學  
念篤化源聞義勇徙見善樂從既能躬率而振作於  
上學者又能感激而興起於下是則上下皆能本之  
以修身以紹內外交盡之學教化之行由躬率而根  
於國學由國學而及於書院由書院而達於四方其  
效固非宋朝之可比將見正學書院又建於東方者



衆而人材蔚爲世用民蒙至治之澤矣奚止修其身  
於家而不得立於朝如宋儒而已哉崇政大夫靈城  
君臣申光漢謹記

院之有基古也因基剏院今也揭號紹修者豈無所  
自夫基在古順興府小白山下白雲洞蜿蜒扶輿磅  
礴而鬱積爲生大賢曰我文成安公裕也公當麗季  
禪釋蜂午道義堙熄慨然以興起斯文爲己任沿求  
乎聖賢性理之源至摹晦菴遺像掛諸壁上常存景  
慕以爲律身苟非誠於內而篤於行何如是其至哉  
此誠吾東方道學之宗主也距今數百餘年遺址荒



涼蓬蒿蕪沒餘響寥寥墜緒茫茫歲嘉靖癸卯年間  
周大人世鵬作宰是邦慷慨興歎尋得遺墟與安氏  
苗裔珽謀立祠廟求奉眞幘遂尊安之又配文貞公  
軸文敬公輔于左右皆文成公之同姓也豈非實紹  
其軌聿修厥德薰芳百世永畱不泯哉祠宇之傍別  
構書院乃以掘地所得鎡金謀賀經史諸子若干卷  
藏諸院壁名集遠近儒士駢赴于此以爲勤學之所  
又哀集安氏世系行狀繼編道學規模指南無不詳  
悉因名之曰竹溪誌金與藏之其勤懇之意切矣厥  
後李先生混踵周爲宰尤致勤於斯病將辭歸上書



于觀察使乃以扶植書院使一道儒士樂趨心學追  
武前修其辭切至使相沈公通源乃嘉其意遂用達  
于九重自 上允俞辭旨下于政院曰賜額可也大  
提學申光漢承命作院額曰紹修斯二字之揭號實  
有以也何者受天之命謂性率性之謂道修道之謂  
學何謂學格於物而致其知一其誠而持其敬極高  
明而道中庸之謂也雖生知學知之有分安行利行  
之有間及其至則莫非一也所謂堯舜孔周之生知  
安行禹湯曾孟之學知利行所修於身而相紹無雜  
者皆是一道也至于大宋濂洛羣哲蔚起相繼明心



學之源致修己之功者何嘗外此哉周濂溪以誠爲本以慾爲戒兩程氏涵養須用敬進學在致知朱晦菴主敬以立其本窮理以致其知反躬以踐其實是所謂相紹以修之道混趨於一而無異也今夫文成公追慕爲己之學實在於此而尋文成之學愈久紹絕各修於身誠以存之敬以主之精一不怠則前後之轍同也彼此之迹一也文成之後文貞文敬紹之文貞文敬之後周侯李侯紹之慕此藏修綿綿追繼者抑豈非來學之責哉院之獲名其義深遠而顧名思義尤起來學之敬也况白鹿洞書院乃李氏之所



居而繼李氏之跡恢拓遺基者乃晦菴夫子也今以  
白雲洞擬白鹿洞乃以書院興廢又擬於彼則亦紹  
修之謂也嗚呼豈徒然哉此不可以無記粗敘其本  
末又繼以辭曰

小白之山屹乎仰止竹溪之水樂乎清美雲深壑幽  
欲尋無跡習習清風于以來襲寥寥餘響薄言追之  
吾黨小子胡不永思都事趙澄記

秋享後序

今歲實萬曆四十年壬子秋九月丁酉有事于晦軒  
先生廟我明侯李公竣躬盡虔執籩豆凡祭官三其



亞或縉紳先生若斯文長老執事倍十皆一邑秀士  
故老傳立廟凡七十餘載迄于今春秋大享無一日  
陰雨今歲恆雨彌屢月咸以爲憂將事之夕陰雲四  
散月星燦朗我侯午夜而起整冠服鼓四鳴行祀事  
祀事畢坐于講堂招祭官若諸生于左右侯起敬而  
言曰今日不雨異哉牲腍粢馨爲諸公賀咸起而再  
拜曰惟明侯奉先師以誠宜致神享諸生何居焉侯  
曰不敢當姑舍是吾因祀禮而有感於懷姑爲諸公  
語夫文成公道德功烈載諸國乘而垂無窮播諸人  
口而傳百世吾不敢伸喙焉第惟我公崇學右文之



誠貫日月而彌宇宙納臧獲累百口以贍養賢之資  
自前朝式至于今扶存學校培養菁莪而吾人不歸  
於禽獸邦國不至于亂亡者皆公之賜也若文貞文  
敬兩先生傳德襲訓焯有聲烈克紹我文成公之道  
其蔚興之美視古聖賢之門鮮有其儔陞配于廟宜  
增耿光爾多士生此君子之鄉聞風覲德有自來矣  
況有廟有院藏修駿髦以罔墜我公之教此實慎齋  
草創於前退溪增飾於後者也爾多士居斯院也果  
何修而何慕歟爲修己治人之學乎爲釣名干譽之  
學乎志欲扶世道而衛邦家乎志欲剝斯民而肥一



已乎觀世之號爲學徒者或鞭撻守廟之僕隸以充其口腹之嗜好或侵奪院藏之什物以助其家室之需索或廢讀遊談攻人害己此則士之最陋者也不必與議而其或口誦典墳心存玉帛舌稱致澤意在讒佞者亦不足觀也此皆爲我公之罪人則可不懼歟吾願爾多士遊於斯偃息於斯一以文成之崇道育才爲念敬慎焉尊慕焉毋或少懈而又以文貞文敬之能繼家聲爲法砥礪名行以戒爾一室則庶毋負乎慎齋退溪兩先師之志而我文成文貞文敬之遺風餘韻不泯於百世矣不然則寧無愧於建廟設



院之意乎諸生憮然降席再拜而謝曰吾儕俵俵錫  
耳聒桃樹巡山摘醋梨者久矣今承指南敢不服膺  
於是乎福酒始酌滿堂交酬相與勉勵亞獻官先生  
執爵而前成一律云有佻文成廟巍然棟宇隆幾年  
香火敬今日血牲豐德與江河廣功侔泰華嵩千秋  
無異議吾道賴而東三獻官飲畢而退獻柏梁體一  
篇曰興州一脈接徽鄉先生道德闡東方滌盡汙俗  
歸虞唐文風從此熾而昌俾今後學皆陞堂至今百  
世不能忘爲建廟宇山之陽龜峯蒼蒼竹水長春秋  
匪懈奉丞嘗仰瞻遺像心先莊如執杖屨先生傍終



使遺風被八荒家國世世扶綱常祝士斂衽再拜頌  
先生詞曰恭惟晦軒之學既以接乎晦翁白雲之扁  
宜亦類乎白鹿前後揆一古今道同茲後學尊慕之  
深誠豈遺像奉安之無所輪焉廟宇之制盛矣俎豆  
之儀大亨在春在秋崇德尚功之爲切多士自南自  
北講道問義之是勤功旣專於藏修趣益真於風詠  
散步霽月橋上便覺查滓消融徘徊翠寒臺邊要令  
節操堅立若聆濂溪水竹水之聲潺湲如對武夷峯  
龜峯之色蒼翠培養一院之俊貴飾三代之治學周  
孔師程朱皆思修己而及物君堯舜臣稷契自許窮



養而達施茲實先生之風敢無揄揚之頌頌訖有一  
白頭腐儒執簡而進敷陳直言曰從明侯以祇祀兮  
趁秋月之揚輝闔天籟兮無聞香爐盡兮漏遲齋余  
服兮趨階執籩豆兮駿奔香始升而馥馥魂髮鬚兮  
如臨如地中之有水兮矧先生之收芋井有源而不  
竭基有礎兮猶舊茲杖屨之所履豈安靈之無所願  
終惠乎後生免同歸於禽獸慨余生之苦晚失依歸  
兮昧昧徒腐屑於斷簡蠹蝕字兮何昧愧天賦之汨  
喪緬先哲之遺軌朝坐馳乎利場夕窘步於捷徑塵  
已蝕於靈臺在病中而生病心出入乎四方兮求雞



犬之不若罪難逃於先正斯反觀而兢惕仰瞻遺像  
之儼然虔攝衽而再拜倘吾心之變遷宜英靈之廻  
余彼堯舜之孝悌我亦同乎厥初賦成有一少年秀  
才乃作白雲之歌曰秋風起兮白雲飛巖有蘭兮芳  
菲菲鳶飛天兮魚躍淵理寓物兮瞻在前盍及求兮  
道非幽郭嶠謹撰

周文敏公追配告由文

李埈

鄉先生沒而祭於社古之禮也恭惟我文成公以文  
教而倡於吾東其興學衛道之功與社之生五穀育  
萬民無異況在枌榆之鄉其所溉於餘波者又如何



哉而前此數百年尚未有妥靈廢食之舉誠是闕典  
慎齋周先生佩符于此政先文教修舉廢墜乃是表  
著道義廟焉而享之其有功於斯道亦大矣稽之禮  
法實合追配茲蠲吉日敢告耐食

書院首末敘

先生卒後二百三十七年嘉靖二十一年壬寅豐基  
知郡周慎齋世鵬以順興廢府之北宿水寺舊墟乃  
公之平日讀書講學之所創建祠院名之曰白雲洞  
癸卯八月癸未奉安公像於北壁配以公之族孫安  
文貞軸安文敬輔二公位版嘉靖己酉方伯沈通源



據知郡李退溪上書聞于朝上特允之賜額紹修  
且賜經籍土田臧獲至崇禎六年癸酉追配周慎齋

竹溪誌序

此下四條出  
竹溪誌○增

嘉靖辛丑秋七月戊子余到豐城是年大旱明年壬  
寅大飢其年立晦軒祠堂於白雲洞又明年癸卯移  
建學宮於郡北別立書院於晦軒廟前或曰甚矣子  
之迂也學宮則然矣至於文成公廟與書院獨不可  
以已乎公既從祀國學達于州縣何必立廟既有學  
校何必別立書院當饑饉不時居淬賤不信我國舊  
無祠若書院欲由我而始不亦近於汰乎余應之曰



然吾觀朱子之爲南康一年之間申修白鹿洞書院  
又立先聖先師祠又立五先生祠又立三先生祠又  
爲劉屯田作壯節亭當是時金虜陷中夏天下血肉  
加以南康地面連歲大飢方賣爵取穀以活流殍其  
危如此其困如此而其立院立祠不一而止者何也  
天生烝民所以爲人者有教也人而無教父不父子  
不子夫不夫婦不婦長不長幼不幼三綱淪而九法  
斁人之類滅久矣夫教必自尊賢始故於是立廟而  
尚德立院而敦學觀之於人心政體所繫不輕如今  
日荒政優與此事相表裏嗚呼晦翁豈欺我哉今夫



竹溪文成公之闕里若欲立教必自文成始某以無  
似當太平之世忝宰是邦於一邑不得不任其責遂  
竭心力乃敢立其廟而架其院置其田而藏其書一  
依白鹿洞故事以俟來哲於無窮時亦不暇顧也信  
亦不暇恤也昔司士賁請襲於牀子游曰諾縣子聞  
之曰汰哉叔氏專以禮許人夫子游不據禮而專諾  
其來譏固宜如某者區區所事皆法晦翁智者必察  
仁者必恕何汰之有曰朱子之賢優於孟氏朱子之  
功配於仲尼其過化之妙必有異於常人者矣然而  
朱子去南康未十年其稱壯節亭者門牆亭牖無復



一存必待曾致虛爲宰然後卽日改築增廣舊制朱子蓋亦有憾矣以此言之則子雖努力立廟院其保十年固未可期也而又無曾致虛爲之後焉則非徒笑侮於今時必且取譏於後日學聖賢要以師其心也如非其賢而踏其跡不亦癡乎曰不然師其心則必踐其所履其迹安可避也避聖賢之跡而不踏則將踏鄉愿之跡吾恐其免之癡而流於賊也大明一統志其載祠宇者一千二百餘所載書院者三百餘所其不載者何限今之佛宇遍諸峯金碧照耀人莫之怪而獨怪於茲鄉之一廟一院者何也此固朱子



浩歎於廬山也若夫立之者在我傳之者在彼在我者我固任之在彼者何憂焉其思得大賢如朱子者而傳之久也命也其不得曾致虛而傳之不久也命也其如命何曰朱子於白鹿必申然後修之子之於白雲無申何也曰白鹿之必申以先代帝王所命也其他則無申焉曰文成公建置贍學錢納臧獲其勤則有之其所學可得聞乎曰高麗史臣自不識道理故能言其功而不知闡其學每讀麗史至文成公傳未嘗不喟然興歎蓋公之脫賊杖巫閭闔之對學校之勤繩己之嚴鑑人之明考其所造非大賢而何惟



其莊重安詳所以能謀善斷至於論夫子則曰臣忠  
於君子孝於父弟恭於兄是誰之教也言若日星昭  
垂萬古至使武人心降而出錢其有功於斯文甚盛  
及其晚年常掛晦菴真以致景慕遂號晦軒慕晦翁  
所以慕孔子也其仁勇至于易簣而不惰則其所向  
之正一洗三韓舊染若益齋圃隱諸公則餘波所漸  
逮本朝禮樂教化已覺與三代并隆爾來二百四  
十年天理之復明文風之大興其誰之力也如公者  
真可謂東方道學之祖雖以辭弘儒崔文昌之賢尚  
不得議其髣髴其他又何說嗚呼是獨不可以從祀



乎而麗史稱安某置贍學錢以此從祀其陋類此竊  
聞公之詩有曰香燈處處皆祈佛簫管家家盡祀神  
獨有數間夫子廟滿庭春草寂無人其排邪憂正之  
意可謂至矣且公之本傳旣曰文章清勁可觀則其  
所著必多而後世之無傳焉者何也蓋公晦而不發  
歟佔畢齋慕其昌歆載得一句於青邱集一鳩曉雨  
草連野匹馬春風花滿城其氣象如化工深味十四  
字足以知公之心矣蓋公之學問雖不及晦翁其心  
則晦翁之心也余謂欲觀晦軒心當觀晦翁遺書欲  
識晦翁面當禮晦軒遺像遂撰竹溪誌若干篇弁以



公家行錄其餘尊賢學田藏書襍錄諸篇則必表出  
朱子所著而爲之冠用寓公慕朱之意其說皆爲已  
之學實出於仲尼顏曾思孟兩程之要旨而與後世  
爲人之學其義利內外精粗本末自有霄壤之判矣  
讀是書者誠能主敬以立本先讀公本傳必尋公之  
所以慕晦翁者何心晦翁之所以使公致慕者何道  
以公所以禮晦翁者禮公千萬洗心然後詳熟晦翁  
諸作則天之所以與我者必淨露其端於吾目中矣  
苟得因其所發而遂究其全體則反身而誠吾事也  
強恕而行吾事也其爲樂蓋將有不覺其舞蹈雖或



禁之而自不能已矣何暇外慕若回雍二子之說於  
請事者其亦不在斯乎某誠蠢騃於道無聞已迫遲  
暮悔之何及然亦有所服膺而慕於是始書之敬告  
同志之來學于書院者甲辰冬十月甲戌尚山周世  
鵬序

與周慎齋書

黃俊良

日者躡清塵詣雲洞齋沐焚香頂禮晦軒遺像溫安  
端肅使人起敬因見夫山川之秀祠宇之尊深喜其  
斯道之有依而又有所待也更於連夜飽承清誨豁  
然若披霧覩天此生殆免虛過良幸良幸吾東方自



殷太師受封洪範之教人始得聞士讓女貞蔚有仁  
賢遺化故夫子有欲居之志華人詠禮義之詩吾道  
之東濬源於斯歷二府四郡降及三國干戈血肉大  
亂極矣有辭弘儒崔文昌生于羅李辭則譯五經訓  
後學特其章句之末耳崔則以文章鳴天下亦非經  
世之學也王氏之興亦未知教文宗時崔文憲設九  
齋導後生世稱海東夫子然措世而無明道之效反  
身而非窮理之實故及門漸波者皆雕華浮薄之士  
而務本抑邪之義世末之聞則所談者特聖賢之糟  
粕耳惟晦軒先生學孔子慕晦菴及其晚年所得益



進至於像晦菴而禮拜之尊晦菴所以尊其道也觀其所向之正有非諸儒所及則公之於道已見大意矣至於忠孝之論降武人之心學校之勤立風化之原一洗三韓變而華之可謂有功於吾儒矣雖不立言垂訓已可槩見其爲人况舉鳳凰一毛而足以知九苞之德乎麗史但稱以贍學從祀而後之人亦不能闡發其幽光以至于今泯泯也甚矣吾東人之不好古也微先生晦軒之道幾無傳矣噫凡人於書史中見一言一行之善者尚且歎慕於千載之下况雷封之內仁賢古家風聲所畱有如晦軒而遺基草沒



尚無叢祠之存則於先生好古取善之意寧不欲汲  
汲尊之以爲尊吾道地耶歲之豐歉不暇問也人之  
笑侮不足恤也及其不惑羣咻斷然行之遺址爲尊  
師之地野田爲藏修之所然後人之驚者疑疑者定  
已翕然矣又置田爲養賢之資藏書爲立教之基旣  
安晦軒像配以文貞文敬邊豆以享之春秋歌曲以  
侑之送迎制已極備無以加之嗚呼是心其晦菴祠  
先師之心乎夫祠廟非古於東而創見於今尊之以  
廟又非特禮之而已旣尊崇之又表出之以繼晦翁  
不傳之緒可謂盛矣頃者又見竹溪誌等篇行錄則



諸安之事諸篇則朱子之書亦皆可觀可法者也吁  
先生用心之勤尊賢之至一至此哉但於編次之間  
未免有疑豈先生未之思也欲使因晦菴而求晦軒  
以知淵源之有自也然竹溪乃安氏之世居取諸安  
所著名以竹溪之誌則可也舉晦菴之書容贅其間  
而金冒竹溪之號則無奈有牽合之病歟旣曰欲識  
晦軒心當觀晦菴書則惟此一言足以盡之求看晦  
軒心者當自取晦菴書而觀之亦足以明其傳之有  
在也何必屈晦菴於竹溪之誌而強爲之貫一哉安  
意於竹溪誌編以諸安之事如學田藏書歌曲俗尚



及凡下書院中事釐爲雜錄尾附其下又拈出晦菴  
大全中名言表以朱書而刊之書院爲學者求晦軒  
之地則名正言直而條理分明書無牽合之疑道有  
無弊之傳於述而好古之道竊意近之若曰無徵於  
古而不信於今必取此爲範則是不過欲人之易知  
也吾之所爲但取法乎古人而已是非之辨自有智  
者他又何問且文貞珠履高陽之曲必出於一時善  
謔之餘而非可誦於後世者也先生旣爲之評又翻  
出聖賢格言作爲詠歌欲歸於正悠然有浴沂詠歸  
之志而浩然有天理流行之妙亦可謂所造之深矣



第恐語雖翻古而如未免涉於自爲則亦不須金入  
於此誌妄意刪去竹溪之曲而金與別錄及儼然等  
歌姑舍之以俟人之見取爾夫自我而無些兒之差  
則一時疵口終必定於後世如有一毫之未盡則適  
足以來吹毛之口故慮之不深則傳之不遠傳之不  
遠則道無以明君子之立教垂訓可不謹哉嗚呼竹  
溪之廟足以光晦軒久晦之道而實吾先生所契於  
晦菴之意則晦菴之道可因是益明而亦足以期後  
聖於不易矣如竹溪之編似未盡出於至當之歸此  
下學之所不能無疑者也然自常人觀之所見已定



於內而外或有疑難之辨必以先入爲主而亦不肯  
許心聽之此則非所疑於高明但恐獨見之智有非  
堂下者之所及見也和而不同未害君子之論罄敷  
管窺仰希取裁暇日溪堂承顏更質亦所勤企俊良  
惶戰拜手

答黃錦溪俊良書

周世鵬

溪堂一話良荷良荷輔仁之義只在謬謬若諂諛者  
卽古人所云賊也非以文相會之義也朋友道鼓絕  
久後世之能箴規者千萬人而一人耳吾於仲舉益  
爲之敬服然所論竹溪誌意固有在不敢有隱於左



右也其爲書固非如曾之學思之庸孟氏之七篇誠以晦翁平生爲吾道殫力其勤至矣而在當世媚嫉者猶指爲僞學必痛絕之然後爲悛於心吾晦軒乃能尊禮於百世之下愛戴如父母嗚呼是心足以繼往聖是心足以開來學是心足以爲生民立極是心足以爲萬世開太平由是言之雖曰朱之道東可也此吾之於竹溪所以立廟院置田書雖被世俗笑侮而不暇顧也旣爲安氏行錄猶慮傷人之吹毛馬則又取朱子之記前賢廟亭堂室者目之曰尊賢錄記學田及藏書者目之曰學田錄藏書錄又爲之雜錄



凡朱子白鹿故事及其平生吟詠與夫嘉言之可以  
敦厲衰俗者雜拈而錄之以見今之所以爲廟院爲  
學田爲藏書者無非出於朱子之所尚而其所言又  
皆爲萬世學者之大法也表章晦翁之學闡發晦軒  
之志固所以尊晦翁非所以屈晦翁固所以遠邪說  
非所以來疵口也又爲別錄上自孔顏曾思孟下及  
兩程朱子其說皆黜邪欲存正理扶斯道攘異端於  
是合諸篇而總名之曰竹溪誌嗚呼此豈所以屈孔  
顏曾思孟程朱於晦軒者耶世日降而道日漓吾於  
晦軒深有所感焉故誌竹溪專以晦翁爲主乃所以



直之非所以曲之也吾夫子假魯史以賞罰天下固已忘其僭矣其於竹溪誌表出晦翁喫緊宗旨爲諸友立幟明其晦軒之所慕者在此而已其知我者命也其罪我者亦命也誠有所不得已者焉又豈有他意耶吾子獨未之思耳且僕之諸歌非僕所自作皆翻得古聖賢格言所以隱括文貞之所謂竹溪別曲者而遺之院中諸彥爲萬一風詠之助也苟有一言以私意牽合則雖被疵論可也如其翻聖賢格言復有何等疵耶果有疵之者乃所以疵聖賢固無與於我也今之爲歌者多出於桑濮如雙花店清歌之屬



皆諭人爲惡此何等語也使風俗靡靡日就於下其  
淫褻敗理至有不忍聞者設使夫子復生其不在所  
放乎吾不可知也周之時以二南正雅用之於邦國  
以三頌用之於宗廟雖變雅亦未嘗歌於賓筵也况  
奏以鄭衛淫聲乎此固晦翁之所極言竭論而僕之  
悶悶遑遑欲矯邪而歸正也夫子大聖也故春秋兼  
述作如僕之歌皆述而不作雖若涉於自爲而實出  
乎聖賢至善至約之要旨則其於修己化俗之方未  
爲無補有何所嫌而遽爲之刪去哉然吾仲舉所論  
皆愛我而發自我視我不如自彼視我也孰論之必



有得其中者乘月臨敘將復討論須使之歸於其正可也

白雲洞敬次朱文公白鹿洞賦

肅承恩于玉階兮宰興州之舊疆念孩愛而長敬

兮孰云初賦之無良咨晦軒之故里兮憫穰粒於硯

塘

硯墨池今廢爲水田

癖竹溪之窮源兮仰小白之鬼岡荷若

人之純美兮揭日月於洪荒塞禮朱而望孔兮顧食

菲而飲芳納臧獲以衛道兮勤一心於我庠顧予學

之杯潦兮夙有志於望洋惕雞鳴以致致兮法健行

於天運諒盈科而後進兮夫固原泉之混混苟得依



乎中庸兮亦甘心於行遯跂前修而僨勉兮慨無及  
於答問矧克配於宣尼兮與羣弟而同進惟 聖朝  
之致享兮逮州縣而無倦夫何里社之闕祀兮俾遺  
恧於來孫年二百又四十兮悅親承其緒論訪宿水  
之古寺兮認當年之讀書白雲橫而如昨兮至人躋  
其楷模步廢礎而延佇兮招巷老以是諏晴峯軒肩  
而獻壯兮幽澗含瑟而爭趨喜立廟之得地兮樂書  
院之繼圖彼章甫之波從兮沛如水之波渠思不奪  
乎農時兮擢日月之其除想白鹿之經營兮心萬古  
之一符改洞號曰白雲兮矢我事之或集儼廟貌之



煥赫兮又遺像之延入溪有毛兮山有柏兮庶簋豆  
之可給結幽蘭以欽欽兮悵絕緒之誰緝闢堂壇以  
藏書兮冀有補於講習水洗洗其不舍兮山巘巘其  
卓立豈柯則之在遠兮惟一德焉允執譬清潭之印  
月兮又孰可以手拾亂曰晦翁晦軒貫一璆兮洞入  
白雲別繁樛兮廟可薦荔堂可遊兮山高水長偕止  
流兮以俟來哲復何憂兮惟飽與安匪所求兮

晦軒先生實紀卷之四







